

# DE REBUS


A CAROLO V. CÆSA-

RE ROMANORVM IM-

PERATORE GESTIS,

Ioannis Michaëlis Bruti

Oratio.



ANTVERPIÆ

Apud Ioannem Bellerum  
sub insigni Falconis.

M. D. LV.

Cum Priuilegio.

*Ne quis in Caesaris ditione prater Io-*  
*annem Bellerum orationem Ioannis*  
*Michaëlis Bruti de rebus à Carolo*  
*V. Cesare gestis, imprimat: aut ab al-*  
*liis impressam intra decennium ve-*  
*nalem habeat, Imperiali sanctione*  
*cautum est.* Bruxella Cal. Aug.  
*M. D. LV.*

*Facuez.*

# PHILIPPO <sup>2</sup>

ANGLIÆ, GALLIÆ,

Neapolisq; Regi, Hispaniarum Prin-  
cipi Maximo & Potentiss.

*Ioannes Michaël Brutus*

S. P. D.



ST magna quædam  
opinio, quæ iam mul-  
torum literis & monu-  
mentis confirmata, pe-  
nitus inter nostros ho-  
mines inueterauit, ita  
maiores in omni genere laudis excel-  
luisse, vt qui eorum virtutem amu-  
lari possint, plurimos illi quidem es-  
se fateantur : qui assequi vlllo modo  
aut æquare, contendant penitus esse  
neminem. Qua quidem in senten-  
tia si imperiti solùm homines essent,  
præclarius sanè agi nobiscum vide-  
retur; sed ii ipsi qui plurimum inter

ceteros fama sapientiæ atq; ingenii  
excellunt, siue hoc illi dandum mul-  
titudinis iudicio esse existimant, siue  
ita (hercule) verè esse arbitrantur, &  
veteres summis laudibus extollere,  
& suorum eleuare ingenia consueue-  
re. Hos ego homines, nō solūm pro-  
pterea quòd ita illi iniqui sunt suis,  
quos incitatos studio gloriæ sua au-  
thoritate deterrent, & remissiores tar-  
dioresq; reddunt, sed etiam quoniam  
in causa iniquissima sunt, refellen-  
dos semper refutandósque censui.  
Nam vt ab iis artibus, quarum vis o-  
mnis in faciendo atq; in agendo est,  
initium faciam; neque Apelles vn-  
quam, neque Lysippus; quorum al-  
ter in pingendi, alter in fingendi arte  
princeps habitus est, si his temporib.  
reuiuiscant, recusaturi sint, quò mi-  
nus qui nostra ætate floruerunt, clari  
homines & iis ipsis in artibus sum-  
mam

mam laudem adepti, secum de prin-  
 cipe loco certent. Ac nostris homi-  
 nibus tamen, si cum veterum præcla-  
 ris illis quidem operibus, quæ multa  
 adhuc Romæ visuntur, eorum signa  
 conferantur, ex æquari fortasse cum  
 illis licuit, fama hominum (quod ini-  
 quissimum est) eodem loco æquè col-  
 locari non licuit. Non necesse hic ha-  
 beo singulos nominare, qui aut hoc  
 tempore, aut paulò ante nostram æ-  
 tatem excelluerunt. Neque enim aut  
 Raphaël Urbinas solus fuit, qui Leo-  
 nis Decimi Pontificatu Romæ cla-  
 ruit, aut Michaël Angelus, utraque  
 iam ille in arte (quod nemini vnquā  
 ex superiorib. contigit) habitus sum-  
 mus; neque is qui maximè in Ger-  
 mania inter ceteros præstitit Alber-  
 tus: sed multos præterea quotidie  
 existere animaduertimus, quorū no-  
 mina cum illi iam inter primos cen-

seri possint, temporū iniquitate sapē  
tradita obliuioni intereunt. Atque  
vt iam ad maiora veniam; vna est  
ars inter homines, qua illi maxime  
sibi aditū patefieri ad gloriam &  
ad immortalitatem putent, quæ to-  
ta in scientia rei militaris posita est;  
neque in ea ipsa tamen habet nostra  
ætas, quod maiorum virtuti & gloriæ  
inuideat. Haud exiguus eorum nu-  
merus est, qui aut patrum memoria,  
aut hac ipsa ætate, cum se à prima  
sua adoleſcentia, rebus bellicis dedi-  
dissent, audeant cum clarissimis supe-  
riorum temporum Imperatorib. de  
hoc studio gloriæ certare. Sed vnus  
Cæsaris virtus facit, vt hoc minus  
mihi in præsentia agere necesse sit.  
Ita enim cum ille sit iam grandis na-  
tu, adoleſcens admodum ad res ge-  
rendas accessit; vt virtute, felicitate,  
sapientia, rerum maximarum vſu,  
ali-

aliisq; omnibus imperatoriis artibus  
superiores omnes, se ipse moderatio-  
ne animi, clementia, facilitate, in-  
summo rerum omnium fastigio su-  
perauerit. Iam ut demus multos &  
apud Romanos homines & apud  
Græcos illustres habitos, qui sua sa-  
pientia & consilio regere ciuitates &  
Resp. possent; facile contra mihi sit,  
plurimos hoc tempore enumerare;  
& summos illos homines, & cum ma-  
gnitudine ingenii præstantes, tum  
plurimo rerum usu exercitados, qui  
hac laudis contentione haudquaquã  
sint illis concessuri. Reliqua sunt stu-  
dia literarũ, in quibus ut se maximè  
vinci nostri homines patiantur; ita  
facile contendant, si cætera sibi cum  
veteribus paria sint, non magis quàm  
in aliis illos fuisse superiores futu-  
ros. Atque (Hercule) quanquam di-  
spar in primis hæc contentio est, ita



multos tamen è nostris, & in philoso-  
phia & in eloquentiæ studiis excel-  
luisse animaduertimus, vt ex anti-  
quis, quibus illi in hoc gloriæ cursu  
præuertant sint plurimi; perpauci  
sint quos sibi vllò in doctrinæ genere  
anteire patiantur. Quæ sanè res cò  
maiores nostros clariòresque reddit,  
quò illis quidem cùm traditas à ma-  
ioribus liberales artes fœdè tempo-  
rum iniuria deprauatas, instaurandas  
perpoliendasq; suscepissent, magis q̃  
superioribus ad laborandum fuit, &  
maiora olim amplioraq; præmia, na-  
uis & industriis hominibus proposita  
ad honesta studia fuere. Qui nunc  
quidem, cum omnibus vitæ præsi-  
diis & ornamentis destituti, careant  
plerunque hominum luce, & in ob-  
scuro lateant: alterum illi quidem  
assequuntur, vt honestatis specie ca-  
pti videantur (quod illis pulcherrimū  
ad



ad immortalitatē futurum est) con-  
 senescere in literis voluisse; alterum  
 non possunt dissimulare; quin in-  
 iquisitissimo animo ferant; iis per sum-  
 mam iniuriam deiectis, qui maximis  
 in rebus consulere vitæ hominum  
 possent; debitum virtuti locum in-  
 dignissimis sæpè hominibus atque  
 adeò natis ad perniciem hominum  
 ingeniis patēre. Qua in tanta tem-  
 porum iniquitate, si ita illi contem-  
 pti & abiecti, vna & eadem voce de  
 communi hac omnium fortuna con-  
 queri possint, si cuius opem & fidem  
 implorare, si quem poscere commu-  
 nium iniuriarū vindicem, te vnum,  
 Rex Maxime Potētissimeq; adeant,  
 te poscant, tuam opem ac fidem im-  
 plorent, te vnum, inquam, esse futu-  
 rum spondeant, cuius ope, potentia,  
 authoritate, singulari quadam in do-  
 ctos & eruditos homines inductione  
 ani

animi & voluntate, & caput attollere  
virtutem, & in antiquum splendorē  
& dignitatem se ipsi vindicare quan-  
doque sperent. Cū autem summa  
tua virtus & sapientia, iacentes & af-  
flictos bonorum animos in spem ere-  
xit, cogitationemq; meliorem; tū  
me vnum & excitauit plurimum, &  
adhortata est, vt cū in exigua spē  
essem, fore vnquam, vt te tantum re-  
gem mihi vllis meis officiis conci-  
liarem, nullo magis munere quā  
propensissimi cuiusdam in te animi  
significatione, hoc me assequi posse  
sperarem. Quod quidē vt facerem,  
optimis, vt me iuuat sperare, auspi-  
ciis, institutam olim à me orationem  
de Inuictissimi Parentis tui laudi-  
bus, tametsi nullum ille vnquam di-  
uinæ illius suæ virtutis monumen-  
tum statuit, te vno filio sibi ad poste-  
ritatem clarius aut illustrius, dicā-  
dam

dam, tibi consecrandamque censui.  
 Atque (mehercule) quanquam in re  
 longè omnium difficillima, multa  
 alia mihi impedimento fuerunt, quò  
 minus mihi ipse placerem; ita sum  
 tamen ex rebus à summo Imperato-  
 re gestis, veluti per vestigia quædam  
 illius laudes persecutus, vt iam quasi  
 in picta tabula, non quidem Cæsaris  
 muta imago, sed verissima illius ani-  
 mi lineamenta, aut expressa, aut cer-  
 tè aliqua ex parte adumbrata conspi-  
 ciantur. Est autem munus, nisi eum  
 à quo proficiscitur spectare malis, &  
 amplissimum, & dignum in primis,  
 quod à Cæsaris filio multò illius ve-  
 riore illustrioreq; imagine, lato atq;  
 hilari animo excipiatur. Quāquam  
 etsi hoc quidem spectari oporteat, ita  
 in eo ipso munere largiendo, totam,  
 quæcunque illa est, in me vis & facul-  
 tas, tibi Rex optime & maxime tra-  
 do,

do, vt si eam quasi tibi fouendam ex-  
colendamq; susceperis, nō desperem  
quandoque fore, eos fructus vt legas,  
qui tibi quidem (quod iis accidere so-  
let, qui ex illa arbore fructus decer-  
punt, quam ipsi seuerunt) videantur  
gratissimi suauissimiq; esse. Interim  
quicquid illud est, clarissimum cer-  
te meæ in te obseruatiæ & studii mo-  
numentum apud posteros futurum,  
inter ea ipsa quæ chariora ti-  
bi gratioraq; sunt, pro  
tua summa virtute  
ac liberalitate  
collocabis.

Datum Antuerpiæ

Cal. Aug.

DE REBUS A CARO-  
LO V. CÆSARE ROMANO  
RVM IMPERATORE  
GESTIS, IOAN. MI-  
CHÆELIS BRVTI  
ORATIO.



Intelligo (Cæsar) grauiſſimam mihi ad dicendum rati-  
onem propositam eſ-  
ſe, qui de tuis rebus  
geſtis, maximis illis  
quidem atque ampliffimis, nullo ipſe ma-  
iore in dicendo uſu, copia, eruditione, elo-  
quentia, dicere hoc tempore inſtituerim.  
Cum enim difficillimum ſemper ipſe eſſe  
exiſtimauī, alias res omnes grauiorēs ſa-  
tis commodè vlla vi orationis explicare;  
tum tuas res geſtas tantas eſſe omnes in-  
telligunt, vt te vnum illi Maximum poſt  
natos homines Regum atque Imperato-  
rum

rum omnium, quòd illas gesseris, esse fateantur; à nemine iidem qui non æquè vt tu in agendo, omnium princeps in dicendo sit, satis pro earũ magnitudine, quemadmodũ à te gestæ sunt, explicari oratione posse cõtendant. Atq; (hercule) tantam hanc rem esse, declarat eorum hominum studium, quos permultos quidem incredibili quadam effferri cupiditate animaduertimus, maiorũ imagines in pictis tabulis fingendi. Qua illi quidem in re, tantò hac vna leuiore, ita præclaros in ea arte homines sibi deligendos esse existimant; vt faciliè ostendant, qui illustrium hominum res gestas explicare literis aggrediantur, quæ verissimas eorum imagines, virtutem, constantiam, animi magnitudinem referant, summo ingenio atque eruditione homines, multoq; dicendi vsu atque eloquentia claros, vocandos adhibendosq; esse. Cũ autem ita statuendum est, præclarissimè cum iis agi, qui

cũ

cùm res laude dignas aliquas gerant, eos habeant, qui iis aut oratione illustrandis, aut monumentis literarum tradendis, parem splendorem & dignitatem, quam illi assequuti esse videntur qui eas gesserunt, afferre possint: tum verò, qui id faciant, non magis de iis quorum res gestas illustrare literis aggressi sint, quàm de iis qui postea sunt futuri (quod maximum præstantissimumque est) optimè esse meriti existimantur. Præclarum est hoc virorum fortium institutum, & viro principe in primis dignum, non solum ut quæ illi præclare & cum laude agant, ob eam causam literis tradi velint, quoniam ita facile videntur posterorū laudes consequunturi, quod illis præmium propositū est ad rectè agendum amplissimum; sed ut ex eorum æmulatione quàmplurimi ad laudem, ad gloriam, ad res magnas gerendas excitentur; quòd nisi apta, illustri, & ad tempus accommodata oratione  
res



res eorum explicentur, fieri haud facile potest. Neque verò (Cæsar) vt cæteros mittam clarissimos potentissimosque reges, qui aut nostra aut maiorum memoria floruerunt, quanquã te semper veræ laudis cupidissimum fuisse, tot res à te summa virtute & felicitate gestæ ostendunt, magis vnquam optasti, vt tuarum laudum monumenta apud posteros exstarent, quòd ita fore sperares, vt eorum etiam testimonio qui multis postea seculis venturi essent, præstantissimus regum atque Imperatorum omnium iudicareris, quàm vt illi tanquam in clarissimum lumen, in tuas res gestas intuentes, te vnum quem ad omnes virtutes imitandis sibi proponerent, omnibus & fortunæ & animi ornamentis longè cumulatisimum haberent. Quæ tua virtus & felicitas tanta facit, vt quemadmodum qui oculorum aciem in solem intendunt, non facile illius splendoris vim & magnitudinem

nem perferre possunt; ita quandiu in tuarum laudum splendorem & lucem intuemur, quas amplissimas & immortales maximis expeditionibus suscipiendis, gravissimis gerendis bellis, omnibus ferè orbis terrarum partibus, tuis victoriis illustrandis es consequutus, penitus nobis mentis aciem & ingenij perstringat; ut neque iam, unde de his orationem instituire, neque ad quem exitum illam perducere debeamus, magnoperè nobis constare queat. Qua re cum cetera omnia quæ in Christiana Repub. ex quo tempore Hispaniarum Rex primùm, mox Imperator es declaratus, summa cum omnium admiratione gessisti, & magna sunt & præclara, & quò te maiorem illustrioremue reddant, nullam videntur præterea accessionem desideratura, tum in eo bello gerendo, quod maximum aduersus Germanos susceptum, summa à te felicitate gestum confectumque vidimus,

B mus,

mus, eam constantiam, virtutem, animi  
 magnitudinem, in victoria exercenda,  
 eam in victos clementiam & misericor-  
 diam ostendisti; ut cum à te omnia ex-  
 pectaretur, quibus, omnibus qui vnquam  
 in hoc Imperio clariores fuissent, longo in-  
 teruallo praeuertes: omnium tamen opi-  
 nionem viceris, te ipse superaueris, propè  
 iam hominis vim ac dignitatē excedens,  
 summa atque immortali quadam gloria,  
 ad diuinitatis fastigium accesseris. Et si  
 autem omnia mihi in hoc dicendi genere  
 difficillima esse videntur, singularis ta-  
 men (Caesar) tua illa animi aequitas &  
 moderatio, me rei magnitudini succum-  
 bentem, & erigit & confirmat, & ut  
 mihi planè confidere audeam, spiritus et  
 fidutiam addit: in eo plurimum mihi vi-  
 deo laborandum esse, ut cum de te dicere  
 instituerim, longè id alia ratione agam,  
 atque illos sequitos esse intelligo, qui vi-  
 rorum principū laudes sunt sua oratione  
 per-

pertractare aggressi. Sunt enim illa omnia sanè præclara, & quæ illis maiora hominum studia, admirationesque concilient, maiorū gloria, splendor, nobilitas; res gestæ, victoriæ, triumphī, monumenta; sed & quæ viris sapientibus parum probentur, vbi vera ac solida gloria absit, & tibi vni in terris maximarum virtutum præsidio nitenti, minimum ad gloriam momentum possint adferre. Itaq; si quis à prima vestra familie origine repetere instituat, quot clariss. Reges atque Imperatores, quot maximi belli Duces, quot viri amplissimi & optimè de Christiana Repub. meriti, maiore hominum existimatione & gloria floruerint: cū non facile exitum suæ orationi reperiat, tum ita fateatur necesse sit, maiores vestros summa virtute perfecisse, vt soli inter homines orbis Imperio digni, Imperium orbis illis dignum tantummodo censeri deberet. Atque quanq̃ cætera omnia,

quæ de iis commeniorari possunt, ut sunt  
 maxima & amplissima, ita quantumvis  
 præclaris hominibus satis afferre gloriæ  
 videntur; longè alia ratione tamen tibi  
 laudi danda esse existimo. Sic enim, Cæ-  
 sar, sapiētissimè semper statuisti, nisi eam  
 gloriam, quam tibi maiores reliquissent,  
 ampliorem redderes; quòd te homines au-  
 gustissima familia ortum suspicerēt, nul-  
 la laude id dignum videri; si eos tua virtu-  
 te ac præstantia superares, cum quæ ipsi  
 magna ac laude digna fecissent, cum tuis  
 rebus gestis in comparisonem venirent;  
 tum quæ magnæ illæ ac præclaræ essent in-  
 tellectum iri, tum verà te ac solidam glo-  
 riam, tum te immortalitatem consequu-  
 turum. Non te igitur, Cæsar, maiores tui,  
 sed tu illos illustras: tibi illi quicquid am-  
 plissimæ atque augustissimæ familiæ di-  
 gnitatis accedat & gloriæ debent: tibi  
 quòd Imperij maiestatem atque amplitu-  
 dinem in omnes orbis partes longè lateq;  
 pro-

propagaueris referunt acceptum; non sperata mortui voluptate fruuntur. Vt verò tibi optandum fuit, eos maiores habere, qui splendore, nobilitate, meritis in Christianam Remp. amplissimis tibi adiutum ac viam ad Imperium patefacerent, ac tantarum tibi laudum tanquā semina relinquerēt; ita nisi tibi cursu rerum maximarum ad gloriam vehemētius & ad laudem contendendum; atque ea omnia tibi iis artibus excolenda censuisses, quæ dignæ principe omnium essent, nunquam tantum gloriæ atque dignitatis esses assequutus, quantum iam vix optare quauis summis virtutib. cumulatisimo principi, in hac vita æquum esset. Ea autem iam à primis tuis annis, in te animi indoles ad virtutem, ad dignitatem, ad gloriam, ad res maximas gerendas fuit, vt quanquā nullis auitæ gloriæ monumentis, nulla maiorum commendatione, nullis amplissimæ familiæ insignibus & orna-



mentis nitereris; tua te virtute tamē ad  
 eam dignitatem, quae maxima atque am-  
 plissima in terris esset, omnes existimarēt  
 peruenturum. Nam si in Alexandro Ma-  
 cedonum rege, quem tu (Caesar) maximū  
 ac clarissimū regum omnium, non Lydis  
 aut Syris aut Persis imbellib. ac praesra-  
 ctis hominibus, sed ferocissimis ac belli-  
 cosissimis populis armis domandis longē  
 semper antecelluisti, dignum maximo o-  
 mnium rege futuro existimatum est, cum  
 ita quereretur, patrem se gloriae avidiorē  
 habere, quā sibi, maiori gloriae cupidi-  
 tate flagranti, expediret, nihil enim sibi  
 ab illo relictum iri, quò illustrius suum  
 nomen efficeret: multò magis id à te ex-  
 spectandum fuit; maximarum te virtu-  
 tum praesidio nitētem, quid in augustiss.  
 familia maiores vestri unquā cum laude  
 egissent, haud ita magni fuisse faetorum.  
 Audieras, Caesar, sapientissimos homines  
 & excellentissimis ingeniis, sic de gloria  
 sta-



statuere, eam verè gloriam esse, quæ maximorum in omne hominum genus meritorum commendatione, ad posterorum memoriam nomen nostrum propagaret: cum autem omnibus ita statuendum esse, sibi de omnibus, quoad eius fieri posset, bene merendum, tum id multò magis ab illo expectari æquum esse, qui cum principatū inter homines obtineret, eas haberet opes & facultates, quibus longè præclarius, quàm ceteri mortales omnes, consulere rebus hominū posset. Itaque cum illa, cum multis communia habuisti, quæ magnificentius tamen de tuis maioribus, quàm ceteri omnes prædicares, maxima virtutis ornamenta, decora, insignia, trophea, statuas, imagines, diuinus atque immortales honores, illud tamen tibi totum vindicasti; cum dignitate omnes, tum virtute, religione, pietate, in Republica Christiana defendenda, fide, integritate, constantia, anteire.

B iij

Hac

*Hac te animi præstantia esse, nondum  
 Imperium adeptus declarasti; quæ digni-  
 tas omnium maxima quæ in terris sint,  
 ita tibi admodum adolescēti summo Dei  
 Immortalis consilio est delata, ut omnes  
 intelligerēt, quod clarissimus ac præstan-  
 tissimus omnium esses, nulla te hominum  
 vi, quam tibi illa ætas haudquaquam po-  
 tuisset asferre, sed diuinitate quadā esse  
 assequutum: Cum rerum vsus atq; ætas  
 prouectior accessisset, omnia te esse gestu-  
 rum, quibus te homines tanquam aliquē  
 in terris Deum suspicerent ac vereretur.  
 Illud autē insigne in Christianam Remp.  
 tuæ pietatis documentū fuit, ac tuæ glo-  
 riæ monumentū ad posteritatem amplifs.  
 Erat omne Inferū mare quā Italia, Hi-  
 spaniæ, Galliæ oram attingit, vndique  
 prædonū latrociniis infestum; ut nemini  
 integrū esset ad exterarum nationes nauiga-  
 re, cui nō grauissima pericula imminerēt.  
 quotidie cædes, rapinæ, direptiones, nauium*

euerfiones exaudirentur. Iam (quòd mi-  
feris vnum in malis præsidium reliquum  
erat) vt in propinquos agros, atque in vi-  
cina oppida feſe è mari reciperent; in a-  
gros, in oppida, in ciuitates, & ſi qua op-  
portuniora iniuriis loca eſſent excurrere  
prædones audebant: vaſtitate omnia, in-  
cendiis, populationibus vexabantur. Id  
cùm priuatim luctuoſum omnibus, exi-  
tioſum vniuerſæ Chriſtianæ Reipublicæ,  
iis eſſet turpiſſimum, qui in illius admini-  
ſtratione principes eſſent; vnus ipſe ado-  
leſcens ad ſalutem Chriſtiani Imperij fa-  
talis dux deſtinatus, altera iam ex Hi-  
ſpaniæ regnis comparata claſſe, eos vn-  
dique à tuis fuſos ac diſſipatos, atque in  
Meningen Inſulam, quam tanquam arcē  
quandam ac propugnaculum ſibi ad ſa-  
lutem inſtituerant, compulſos ad deditio-  
nem redegiſti. Ea res cùm metu ingenti  
omnes liberaffet, ac grauiffimā labem &  
ignominiam è Chriſtiana religione ſum-  
ma

ma tua gloria sustulisset, omnium quidem  
 animos confirmavit, in maximam spem  
 erectos, te unum afflictas ac labantes Chri-  
 stiani Imperij res in suam antiquam di-  
 gnitatem & splendorem vindicaturum,  
 atque adeo ut te unum Imperatorem ex-  
 peterent, deposcerent, votis iam atque a-  
 nimis destinarent, perfecit. Ita enim o-  
 mnes censebant, cum de Imperatore in  
 Christiana Republica deligendo agere-  
 tur, eius fidei maximè illius administra-  
 tionem credendam esse, qui tanto studio  
 atque animi ardore, initio statim sui princi-  
 patus, Christi hostes esset aggressus; qui  
 unam sibi viam ad gloriam patefecisset,  
 barbarorum vires, insolentiam, arma re-  
 primere, à iugulis nostris arcere, Chri-  
 stianis populis pacem, otium, securitatem  
 præstare, Imperij Maiestatem virtute,  
 auctoritate, armis tueri. Ea igitur, iam  
 declaratus Imperator, suscepti à te Im-  
 perij auspicia esse voluisti (tanquam tibi  
 prouin-

*prouincia Asia demandata esset) paratā in Turcas expeditionem, eaque arma suscepta, quibus cū immortalē tibi famam ac gloriā parares, tum (quod tibi omnium antiquissimum esset) plurimas ciuitates, prouincias, regna, Imperia, quæ acerbissimæ seruitutis iugo oppressa, crudelissimus barbarus, atque adeo summa Christiani nominis ignominia, possideret, in libertatem tua virtute vindicares.*

*Summa erat omnium de te exspectatio; ingens animorum alacritas; certam sibi de hostibus victoriā omnes, te Duce, spondebant. Sic cū tanquam signum quodam communis omnium salutis ac libertatis sustulisses, vnique Christiani nominis hostibus tua arma formidabilia, pestem, cladem, exitium allatura, cæteris omnib. salutaria futura viderentur, quorum cōsilia ad otium & ad pacem spectarent; ambitio Gallorum illa à capitibus hostium auersa in Europam reuocauit.*

*Id*

Id quanquam de Christianæ Reipublicæ  
 maiestate detraxit plurimum, hostesque  
 reddidit ad illam inuadendam alacrio-  
 res, summi principis præsidio nudatam;  
 semel tamen à te partam gloriam auxit,  
 atque in aduersarios (si quid inde gra-  
 uioris incommodi populo Christiano eue-  
 niret) omnem inuidiam odiumque conci-  
 tavit. Satis tu enim antea documenti de-  
 deras, quo animo, qua virtute, qua reli-  
 gione, qua fide sanctissimam esses religio-  
 nem à Christi hostibus defensurus; cum  
 quidem quæ esset optima Imperij admini-  
 strandi ratio teneres, non te minori vir-  
 tute, ad illius maiestatem inter Christiā-  
 nos tuendam, quàm ad barbarorum iniu-  
 rias propulsandas accessurum. Ergo quò  
 te aduersariorum arma vocabant, totus  
 ad bellum Gallicum auersus; summaque  
 usus tuorum virtute ac felicitate, qui tuo  
 nomine Italiam prouinciam administra-  
 bant; breui vnuerfos hostes victos, pro-  
 fliga-

fligatos, castris exutos, ex Insubrum, ac  
Ligurum agro reiecisti, maximaq; par-  
ta victoria; vt iam omnes faterentur, te  
pacis atq; otij conseruādi studio, nullaq;  
ambitione aut cupiditate elatum, arma  
sumpsisse, possessione opulentissimæ ciui-  
tatis atque adeò totius Insubrum princi-  
patus qui semper sub ditione Romani Im-  
perij, tum quidem iure belli, tibi adiudi-  
candus esset, Francisco Sfortiæ aduersæ  
factionis homini, tua sponte cessisti. Cu-  
ius tu rei fructum quidem vberrimū atq;  
maximum tulisti. Cū enim eius prouin-  
ciæ possessionem, quam tibi omnia diuina  
atq; humana iura afferret, ac per fraudē  
tibi ab hostibus interceptam, summa vir-  
tute, armis, asseruisses, tua sponte ab Im-  
perio abiudicasti: liberam (deductis ex  
vniuersis ciuitatibus præsidiis) homini,  
quod multi prædicabant parum æquo in  
te animo, parum beneficij tui memori fu-  
turo, reliquisti: quam non laudem, quod  
non



non præmium, quam non gloriam meritus? Neque verò aut consilium tibi, aut vires, aut opes deerant, ad iura eius prouinciæ, quanquam longissimè abesses, tuenda. Verùm aderant tum in Italia Clarissimi belli duces, & qui cum aliàs tuis auspiciis res amplissimas gessissent, tum proximè vniuersis hostibus debellatis, eandem tibi prouinciã armis adiudicassent. Hac tanta animi moderatione & equitate, quæ in priuato homine maximæ laudis commendationem haberet, satis declarasti, te, id quod præclarissimum sit, non imperia, non honores, non dignitates, quas haud rarò deterrimi ac perditissimi homines malis sibi rationibus conciliarent, sed cùm iis dignus esses, pacem & concordiam in Christiana Republica consecrari, vnũ tibi studium esse, compositis Italiae rebus, victricia arma in Christi hostes, vnde auocata essent, transferendi. Nihil quidem ab optimo

NON  
prin-

principe, & qui summam imperij in Chri-  
 stiana Republica administraret, poterat  
 fieri ad gloriam illustrius, quàm Repu-  
 blica inter Christianos constituta, arma  
 Christi hostibus inferre, ac tantam la-  
 bem & ignominiam quæ sanctissimæ re-  
 ligioni hæreret, sua virtute ac consilio  
 tollere. Præclarum enim est, ac magno  
 homine dignum, posse utcumque vii ho-  
 mini prodesse; cum vniuerso Christiano  
 orbi tot iam sæcula, inter grauissima bel-  
 la, importunissimorum hostium armis  
 afflicto atque oppresso, pacem, salutem,  
 incolumitatem attulisses; cum id quidem  
 salutare omnibus, tum tibi speciosissimū  
 ad gloriam atq; ad æternitatem futurū  
 erat. Existimabant fere omnes tanta cla-  
 de accepta, Gallos aliquando conquietu-  
 ros, ac finē bellandi facturos. Iam in Apu-  
 lia, in Campania, aliquot ab hinc annis vi-  
 ctos, amissis maximis exercitibus ex Ita-  
 lia electos, scēdissime fugatos meminerāt;  
 Italie

Italiae ciuitates vniuersae, cum aequè in  
 spem pacis essent erectae, abiectis armis,  
 belli consilia minimè probaturae esse vi-  
 debantur. Sed tantam populo Christia-  
 no felicitatem, aduersa quaedam illius for-  
 tuna inuidit. Nondum enim cum omnia  
 in hoc rerum statu essent, verterat an-  
 nus, cum Galli de integro maximis con-  
 tractis copiis, vnde paulò antea tanta su-  
 orum strage aufugerant, ad Insubrum  
 regnum inuadendū descenderunt. Ea ho-  
 mines ambitione & cupiditate feruntur,  
 vt Christianae Reipublicae Imperatorem,  
 cuius virtute, fortuna, felicitate saepe vi-  
 eli profligatique essent, ad suam quàm ad  
 hostium perniciem arma vertere, Italiae  
 quàm Asiae clade sibi gloriam parare,  
 Christianissimum, quàm Turcarum re-  
 gem captiuum, in triumphum ducere ma-  
 luerint. Ligurum iam atque Insubrum  
 vniuersas ciuitates, & inter eas Medio-  
 lanum, quam urbem omnium clarissimā,

tan-

tanquam eiusce belli caput, atque arcem,  
 petebant, tantarum rerum molem mini-  
 mè expectantes, aut vi, aut metu, aut de-  
 ditione receperant, summos belli duces qui  
 tuo nomine eam prouinciam obtinebant,  
 quanquam virtute, gloria, magnitudine,  
 rerum gestarum clarissimos, Ticinum  
 ingenti metu oppressos compulerant; si  
 qui ex fœdere tuis auxilio esse cogeren-  
 tur, & inter eos Clementem. VII. Ponti-  
 em Maximũ (neque verò deerant qui  
 eius impulsu Gallum in Italiam irru-  
 ere existimarent) ad defectionem, aut  
 metu, aut spe, magnitudine pollicitatio-  
 num induxerant; in omnibus denique  
 eam de se opinionem excitauerant, vt  
 vniuersum orbem sui nominis terrore in  
 suam ditionem redacturi, nullæ vires,  
 nullæ copię eorum vim, potentiam diu-  
 tius passuræ esse viderentur. Hæc cùm  
 ita omnes metu, ac pauore perculissent,  
 vt eorum adhuc recordatione nostri ho-  
 mi-

mines perhorrescant; te vnum de cuius nomine, dignitate, salute, imperio agebatur, celsiorem semper atque erectiorem animo habuerunt. Vnius sanè Caesaris erat, cùm omnium mortalium Princeps dignitate esset, humana omnia contemnere, inuictumque ad omnia animum præstare: neque solùm maiorum commendatione, sed virtute, consilio, animo, auctoritate, augustissimam atque amplissimam in terris dignitatem tueri. Longissimè tu quidem eo tempore ab Italia aberas, maximis ac gravissimis Reipublicæ negotiis impedit

Atqui quanquam cuiusmodi res tuæ in Italia essent, audires, nullus te metus, nullus terror, nullæ hostium minæ, nulla tuorum pericula, cùm gravissima & maxima iis perpetuò impenderent, te inde detrahere vlla ratione potuerunt.

Quæ res tamen ita ab omni temeritate absuit, ut aegrè diiudicari possit, prin-

cipio

cipio eiusce belli, fortius ne an prudentius; eodem gesto, moderatius, an pro hominum existimatione magnificentius, te gesseris. Cuiusmodi Gallorum ingenia essent, quæ eorum in bellis gerendis ratio, qui mores, quæ instituta, quæ vires, summa quidem eorum clade, maxima tua gloria, antea expertus eras: principio vires eorum intolerabiles, ingentia corporum robora, cum prior impetus resedisset, nihil illis præfractius atque effœminatius esse; Cum igitur summi Ducis atq; Imperatoris fuit, opinionem, qua ut plurimum bella geruntur, pro præsentis rerum statu maiorem hostibus de sua virtute ostentare: tum eos duces in Italia habebas, de quorum consilio, prudentia, fide, tibi esset nullo modo dubitandum: ubi decernendum armis esset, virtutem atque constantiam, in Imperij dignitate retinenda, singularem eorum esse intelligeres. Ergo cum ad Calendas

Octobr. Galli tanto omnium terrore in  
 Italiam descendissent, ante easdem In-  
 tercalares, eos signis collatis à tuis vi-  
 ctos accepisti, capto eo Rege, qui vnus  
 omnium nobilissimus ac post hominum  
 memoriam potentissimus esset. Nus-  
 quam aut patrum aut maiorum memo-  
 ria, aut grauius bellum, aut difficilius,  
 aut maiori cum celeritate gestum confe-  
 ctumque audiuius. Itaque si Cæsar sibi  
 verti summæ gloriæ voluit, quòd aduer-  
 sus Pharnacem Ponti Regem (bello su-  
 scepio) venisset, vidisset, vicisset; quanta  
 tibi amplius & magnificentius ad homi-  
 num commendationem & laudem fuit,  
 qui vbi infestissimum bellum ad te oppri-  
 mendum, in nobilissima totius orbis ter-  
 rarum prouincia ortū audisses, sola illud  
 tui nominis fama atque opinione absens,  
 atque adeò ita breui, ita feliciter, ita ex  
 sententia (tanta de hostibus parta victo-  
 ria) confeceris? In eo omnes summā Im-  
 perij.



perij verti existimabāt: aderat summus  
ac potentissimus rex cū maximis copiis;  
hostes huiusmodi, quorum nomen, aucto-  
ritas, vires, præter te vnum, cunctis for-  
midabiles essent: tui intra Ticini muros  
famē, obsidione oppressi, iam vltima oīa  
passi, propediem in potestatem hostium  
venturi, latebant. Quæ omnia cū ita  
præter omnium exspectationem fortuna  
commutarit, vt qui se antea totius orbis  
terrarum breui victores esse iactarent,  
paulò postea victi, profligati, castris atq;  
impedimentis exuti, eum Regem quē sua  
opinionē Romanorum Imperatorem ha-  
berent, captiuum duci animaduenterent:  
non te ea solū omnibus huiusce ætatis,  
sed omnium seculorū clarissimis Regibus  
atque Imperatoribus prætulerunt. Tot  
bella populus Romanus gessit, tot popu-  
los, tot nationes, tot immanes ac barbaras  
gentes deuicit, in suam ditionem redegit,  
tot maximos ac fortissimos belli Duces

atque Imperatores extulit: Maximus,  
 Africanus, Paulus, Marcellos, Marius,  
 Pompeios; quorum perpauca hostium du-  
 ces, nulli tantum Regem unquam in tri-  
 umphum duxerunt. Ergo Pauli gloriam  
 maximam fuisse fatentur, qui Macedonia  
 deuicta & in prouinciae formam redacta,  
 vinum Persea cepit: Marium, qui Iugur-  
 tham, laudibus maximis afficiunt: quo-  
 rum neutrum tamen quisquam aut di-  
 gnitate, aut opibus, aut (id quod maxi-  
 mum est) studio gloriae huic parem fuis-  
 se dixerit. Iam si ita existimandum est,  
 semper praeclarum esse hostes vincere; eos  
 quidem vincere qui animo, viribus, copiis  
 sint pares, rem tantam ut facilius à mul-  
 tis optari, quam obtineri possit; eum Re-  
 gem atque hostem cepisti, de quo non fa-  
 cile constet, clarior ne an nobilior, po-  
 tentior, an (Hercule) tibi infestior fuerit.  
 Erat ille quidem cum ex iis maioribus  
 qui principatum in Romano Imperio in-  
 genti

genti sui nominis gloria, obtinuiſſent; tum iis opibus & fortunis, vt ſi id ab- fuiſſet ad tantam dignitatem æmulan- dam tamen ſpiritus ſumere, ſe eſſe tibi parem exiſtimare poſſet. In tanta re- rum tuarum fortuna, cū ita tibi omnia læta ac ſecunda eueniſſent; quo quidem tempore miſiſſimo etiam ingenio homi- nes efferri animis ſolent; cū tantū ho- ſtem viciſſes, captiuum apud te haberes, de eo iure belli ſupplicium ſumere; tantū Imperij æmulum, nullo negotio de medio tollere; opulentiffimi regni vires frāgere; euertere, delere poſſes; nihil à te inſolens, nihil barbarū, nihil immane, nihil quod alienū eſſet à moderatiſſimo principe, vi- dimus. Deductū illum cū claſſe in Hi- ſpaniā, Madrilli aſſeruari ad tuum ad- uētum iuſſiſti, liberali admodū custodia, & quæ præter libertatem, quam ille quo ſe die viciōri deditiſſet, amiſerat; nihil quod eſſet perſona regia dignū, adimeret.

In morbum incidit, neque id, quod Galli contendunt, squalore carceris, sed animi ægitudine, tristitia, mœrore, quibus ille tantæ fortunæ minimè patiens perpetuò angebatur; quo tempore eum visendi causa, id quod tibi per grauissima negotia non sine tuo maximo incommodo liceret, hostem captiuum ac supplicem adiisti; solatus es; bono animo esse iussisti; si ad pacem atque ad otium illius consilia spectarent omnia illi, salutem, libertatem, regnum te restitutum pollicitus. Quid hac animi æquabilitate lenius? quid clementius? quid mitius? quid in tanta fortuna à summo principe expectari moderatius potuit? summæ felicitatis fuit hostem vicisse, cepisse, potuisse in illum ad satietatem scire; sed nihil maius aut præclarius, quàm te usque eò moderatū tibi esse, ut ægrum inuisere, solari, oblati pacis conditionibus ultro ad pacem prouocare potueris. Magni animi, inquam

quam, significatio fuit, & Cesare digna  
virtus, nō solum integris adhuc viribus,  
maximis fortunæ præsiidiis fidentem, ar-  
mis superasse, sed captiuum & animo &  
corpore ægrum, maximisq; cruciatib. con-  
fectum, in summo mœrore & luctu amis-  
sa libertate agentem, modestia, facilita-  
te, humanitate, te ipsum (quod difficilli-  
mum est) optimo iure in tanti hostis per-  
niciem incumbentem, clementia ac mise-  
ricordia vicisse. Audio eruditissimos ho-  
mines, Cæsarem cū post deuictum in  
Pharsalia Pompeium, vniuersis hosti-  
bus, quicunque se suæ fidei tradidissent,  
veniam dedisset; maximis atque amplis-  
simis laudibus extulisse; eum plurimos  
mortalium maximis bellis terra mariq;  
gerendis, munitissimis ciuitatibus expu-  
gnandis, ad internicionem delesse; fero-  
cissimas gentes, barbaras atque exterar.  
nationes parere populo Romano coëgisse:  
neque tamen inde tantum gloriæ ac lau-  
dis,

dis, quantū iam victoria potitum ita inimicis suis ignoscendo sibi conciliaſſe. Eſſe enim eam victoriam clariffimam, qua ipſius victoriæ vis & conditio vinci poſſit: magnificentiffimū triumphum quem homines cupiditate, iracundia, libidine, omnibus vehementiorib. animi affectio- nibus ſuperatis de ſe agant; cætera illa omnia, claſſes, exercitus vincere, ciuita- tes expugnare, cū eam naturā vt vinci poſſent, haberent, à ſumma laude abeſſe exiſtimanda. Itaq; illud in maximis lau- dibus eidem adſcribunt, cū in Africa nūtiū de morte Catonis accepiſſet, eum & illachrimaſſe, & nimium fortunā ſuæ gloriæ inuidiſſe conqueſtū: quæ ſibi enim hoſtem è manibus eripuſſet, cui ſi parce- ret, omnium laudes & gloriam fuiſſet ſu- peraturus. Qua magnitudine laudis, cū te Cæſari aut parem, aut ſuperiorem oſten- deris, in eo illi longo interuallo præuer- tiſti. Neque enim eadem tibi & Cæſari  
pro-

proposita ratio fuit in hostibus conser-  
 uandis. Nam ei qui in libera ciuitate &  
 quæ imperium in omnes gentes haberet,  
 principatū esset et regnum instituturus,  
 hac clemētiae opinione erant homines de-  
 liniendi, sensim ad seruitutē perducendi,  
 his artibus vt parēre discerent, assuefa-  
 ciendi; quarum rerum nulla tibi ratio ha-  
 benda fuit. Cū enim in eas gentes ac po-  
 pulos Imperium habes, quibus semper po-  
 pulare ac plausibile nomen regium fuit,  
 tū vt libentissimē tibi parēre vellent, iam  
 à primis tui Imperij auspiciis, tua clemē-  
 tia, æquitate, virtute, sapientia perfec-  
 ras. Quòd igitur hosti ignoueris, quòd  
 illi grauissimas atque acerbissimas iniu-  
 rias condonaris, quòd eas pacis conditio-  
 nes obtuleris, quæ victo æquiores quàm  
 victori essent, quòd postremo libero abi-  
 re iussò sororem in matrimonium collo-  
 caris, quòd acerrimum hostem victum,  
 captiuum tua affinitate dignū duxeris:

nul-




nullo metu id, sed studio pacis tuendæ,  
 Christianæ Reipub. conseruandæ, arma  
 cōmunib. hostibus inferendi causa (quæ  
 vna res semper tibi maximè curæ fuit)  
 impulsus egisti. Nanque eodem spectat  
 singularis in eundem illa animi modera-  
 tio, qui cūm (si quid cōtrouersie de pro-  
 uinciis esset) positis armis te iudicio di-  
 sceptaturum pollicitus eras. Illa enim si-  
 lentio mihi prætereunda esse censeo, qua  
 omnium ordinum multitudine, qua fre-  
 quentia, quibus populorum studiis, quo  
 plausu decedentem illum ex Hispania sis  
 prosequutus. Satis constat te vsque eò in  
 illo ornando, ab Imperij dignitate reces-  
 sisse, vt paulò antea captiuum regem, qui  
 tuo beneficio, libertatem, salutem, vitam,  
 dignitatem retineret, in dextera haberes  
 incedentē, ouantis ac triumphātis speciem  
 præ se ferentē, tanta tua gloria, inquam,  
 à te victum, assēclari patereris. Et sunt  
 enim illa peruulgata, & eam iam homi-  
 num

num opinionem fueras tuæ vitæ constan-  
tia consequutus, vt si quid ageres, quo te  
omnium hominum clementissimum, mi-  
tissimum, moderatissimum esse significa-  
res, id neque mirum, neque nouum cuiquā  
videri posset. Iam in constituendis Italiæ  
rebus, quæ tãto bello labefactæ ac penè  
euerse erant, nulla quidem tuæ dignita-  
tis, nulla tuorum cuiusquam commodi ra-  
tione habita, nobilissimam totius Italiæ  
prouinciā, quā paulò antea ex hostium  
faucibus ereptam, tanta virtute vindi-  
casses; quæ tum ad belli subsidia, tum ad  
pacis ornamenta, omnium opportunissi-  
ma esset, quæ vberrimos atque opulentis-  
simos fructus suppeditaret: eum obtinere  
es passus, qui cum tuis hostibus paulò post  
consilia initurus, in tuum caput conspi-  
raturus, bello, vastitate, incendiis vniuer-  
sam Italiam vastaturus esset. Nam non  
ita multò postea tui perniciosissima con-  
spiratione patefacta, quā aduersus tuam  
digni

dignitatem omnes ferè Europæ principes cum tuis hostibus inierant, Franciscum Sfortiam Insubrum principem, quo maxime authore ita illi conspirasse dicebantur, coëgerant se in Mediolani arcem recipere, ibique omnibus vitæ præsiidiis atq; ornamentis destitutum, de extrema sua salute cogitare, ac sollicitum esse. Cùm interim, quanquam te crebro suis literis sollicitarent, magnopereq; contenderent, homini imperares, vt ex arce excedere, suiq; potestatem ad quæstionem facere vellet, neque iis ita de sua salute sollicitis morem gerere voluisses, & positis armis quibus longè te superiorem esse intelligeres, ex iuris æquitate, qua vna rē vinctum in terris patereris, causam illius de integro cognoscere cōstituissem. Quanquam eius moderationis laudem aliàs nō minorem tulisti: cū enim ille graui morbo esset oppressus, omnib. Italiæ populis de re tanta sollicitis ac perturbatis, quibus

*si nobilissimus Italiae principatus tu.e. di-  
 tioni accederet, nimium tua potentia for-  
 midabilis esset, vt omnium quieti atq; otio  
 consuleres, cuiusce rei liberam potestatem  
 Pontifici Maximo permisisti, quemcun-  
 que ille Insubrum principem nominasset,  
 modò ne esset ex hostium numero, æquo  
 animo passurus. Iam summo desiderio  
 suorum Franciscus Rex libertati resti-  
 tutus, aduersus te, suum conseruatorem,  
 cui dignitatem, fortunas, libertatem, vi-  
 tam deberet, cuius summam in se clemen-  
 tiam atq; humanitatem acerbissimo suo  
 tempore esset expertus; cū Clemente. VII.  
 Pontifice Maximo, atque vniuersis Ita-  
 liae principib. fœdere percussò, toties à te  
 concussas ac præfractas vires erexit, exci-  
 tauit, bello de integro terra mariq; multò  
 etiã maiorib. q̃ antea viribus instaurato.  
 Ea fuit scilicet Pōtificis Max. et Christi  
 personā in terris gerētis (vt Christianos  
 alios principes mittam) religio & fides:  
 cūm*



cùm optimum ac religiosissimum principem, grauissimo gerendo bello oppressum deferere, & cui auxilio esse ex fœderis religione deberet, hostibus prodere: tum aduersus victorem, sollicitatis ad defectionem fœderatorum animis, fœdus ferire, vniuersos Europæ principes, & (quod referre pudeat) Turcas & Afros, perpetuos nostræ religionis hostes ad bellum excitare, omnia deniq; quæ ne ab immanissimo Turca expectanda essent, aduersus Christianissimum principem, sanctissimamque religionē, impudentissimè crudelissimèque moliri. Itaque quo incendio conflagrare Asia debuit, Italia, in qua vix prioris belli flamma restincta esset, exarsit: quibus armis crudelissimorum hostium vires deleri, Italiæ robur concidit: qua virtute Christiana Respub. aduersus Turcam ad se tuendam vti, aduersus Christi Pontificem, aduersus Christianiss. regem est vsa. Nondum à regis  
libe-

liberatione exactus annus erat, cum san-  
 ctissimū (si diis placet) fœdus inter Chri-  
 stianos principes aduersus clarissimū Im-  
 peratorē, Christianæ religionis ultorem  
 & vindicem, cuius vnus præsidio, Italia  
 atq; Europa vniuersa, tuta à barbarorū  
 iniuriis & maleficiis esse posset, auctore  
 Pontifice Maximo ictum est. Sic dum in  
 propriam perniciem conspirantes Chri-  
 stiani principes suis sese opibus perdunt,  
 ac diuinā tuam (Cæsar) virtutē ad suam  
 malunt, quàm ad hostium ruinam exci-  
 tati, Pannonia à Barbaris inuaditur, cla-  
 rissimus ac nobilissimus Rex ab acerri-  
 mis nostræ religionis hostibus cum vni-  
 uersis copiis ad internicionē deletur, Chri-  
 stianorum vrbes diripiuntur, vastantur,  
 ad solum euertuntur, omnia cædibus, san-  
 guine, cruore, incendiis cōplentur. Tan-  
 tam cladem Christiana Respublica, non  
 à Turcarū Imperatore, sed à Pontifice  
 Maximo, sed à Christianis Principibus,

D

quo

quorum ambitio, cupiditas, odium, tua  
 arma ad Imperij salutem & dignitatem  
 defendendam, in Italiam auerterant, ac-  
 cepit. Itaque eodem ferme tempore, &  
 Pannoniae vrbes Turcarum seuitia, &  
 Italiae ciuitates Gallorum & Pontificis  
 armis concidebant: Christiani homines  
 Christianorum simul et Turcarum vim,  
 barbariem, crudelitatem, iniurias, contu-  
 melias, experiebantur: cum nihil spei in-  
 terim, nihil praesidij, nihil quod perfuge-  
 rent, te suo principe de tua salute cogita-  
 re coacto, in ullo mortalium reliquum ha-  
 berent. Nam illa, quanquam te inuito, at  
 summo Dei Immortalis consilio, tuarum  
 iniuriarum ultoris, mox consequuta sunt;  
 Romanae vrbis captiuitas, in ea diripien-  
 da, populationes, caedes, incendia, matrum  
 familiās, virginum, ingenuorum constu-  
 prationes, sacrarum aedium euerfiones,  
 Pontificis, Cardinalium, amplissimorum  
 hominum deditio, tot clades, tot hominū  
 inte-



interitus, tot mala, ut eorū recordatione  
 ipsi etiam qui nō interfuimus ingemiscamus. Iam Gallis in Italiam profectis, quā  
 dies vnq̃ nobis proximo non acerbior ac  
 calamitosior illuxit? quem vacuum à cæ-  
 dibus, à populationib. ab incēdiis vidimus?  
 Ticinum vrbs capta, direpta, incensa, om-  
 nes Insubrū ciuitates, quò illa belli fax  
 peruasisset, rapinis, populationib. exhau-  
 stæ: calamitosissima ac luētiosissima illa  
 omnibus Gallorum in Apuliam atque in  
 Campaniā profectio, Neapolitanæ vrbis  
 obsessio, pestilentia, fame, rerum omnium  
 inopia æquē obsessi & qui obsiderent, af-  
 flicti & vexati; ex .LX. hominum mil-  
 libus qui ad eam urbem obsidendam con-  
 uenerant, ad .XL. millia desiderati. Is  
 finis atq; exitus sanctissimi illius fœderis  
 fuit ad Christianæ Reipublicæ defensio-  
 nem ic̃ti: tua quidem religio, pietas ea-  
 dem, gloria maior atque illustrior: homi-  
 num studia qui tuæ laudi fauerent, longè

in te propensiora. Odio, acerbitate, iniuriis hostium, atq; adeò armis lacepsitus, neq; ad eos quidem vlciscendos, sed ad te tutandum, arma sumpseras; eorum vires & audaciam fregeras; Imperium tibi à Deo Immortali traditū summa virtute tutatus eras; nihil deniq; nō optimo principe dignum gesseras. Nam si qui in acie ceciderunt, cum aduersus principē Christianæ religionis arma cepissent, neque hoc sanctissimo nomine erant digni censendi, & cur ex illorum iactura doleret Christiana Resp. nihil subesse causæ videbatur. Ea ita esse Deus Immortalis, qui perpetuò tibi adfuit, tuos semper tutatus est; qui (quod nulla humana vis, nullū ue consiliū efficere vnquam potuisset) terra mariq; hostes longè tuis superiores euertit, profligauit, deleuit, clarissimè ostendit. Nam illud tibi immortalī gloriæ fuit, eundem te animū in aduersis rebus, tot malis circumuentum, tot

ad

aduersæ fortunæ fluctibus iactatum, re-  
tinuisse, quæ paulò antea homines tanta  
tua laude in letis & secundis maximam  
ac clarissimā victoriam de tuis hostibus  
adeptum vidissent. Quanquā enim eam  
in te virtutem atque animi præstantiam  
iam pridem omnes admirati erant, mini-  
meq; erat opus, quò id nobis exploratius  
esset, te grauiori fortunæ ictu peti, id ta-  
men ad tuam constantiam significandā,  
opportunum atque adeò necessarium esse  
videbatur. Vt enim in cursu haud satis  
sit ei qui ad victoriam contendit, acriorē  
impetum cum è carceribus exit adhibere,  
nisi eundem perpetuò retineat: Ita indi-  
gnum summo principe erat existimandū,  
cū te homines fortissimum in omnibus  
fortunæ incommodis superandis esse ani-  
maduertissent; nisi te eundem esse in cæ-  
teris tuis temporibus, si qua tibi se acer-  
biora ostenderēt, præstitisses. Admirātur  
(Cæsar) nostri homines maximas alias

in te virtutes, quæ perpetuam illam tuam  
 in bellis gerendis fortunam & felicitatē  
 comitantur, integritatē, innocentiam, re-  
 ligionem, temperantiam, inauditā quan-  
 dam prioribus sæculis in supplices & vi-  
 ctos misericordiam, clementiam, mansue-  
 tudinem, facilitatē: inuictissimi quidem  
 illius animi robur, grauitatē, constantiā,  
 fortitudinē, quam in aduersa fortuna ge-  
 ris, nullis satis dignis laudibus consequi  
 possunt: Iam illud perspicuum (Cæsar)  
 esse video, quod principio meæ orationis  
 præfatus eram, nullum esse hominē adeo  
 grauē ac copiosum in dicendo, nullum ita  
 eloquentē, nullum ita ingenio, vsu, erudi-  
 tione, arte præstantē, qui ad rerum tuarū  
 magnitudinē oratione consequendam par  
 esset: quanquā oīa semper à te summa essent  
 exspectata, itaque homines putarēt, nul-  
 lum tecum superioris ætatis clarissimorū  
 Regū atque Imperatorū aut virtute, aut  
 gloria esse conferendum, te omnium ex-  
 spe-

spectationem superasse, ac longè vniuer-  
 sos retro post te reliquisse. Nondū enim  
 Galli aut tibi satis ad gloriam materiæ,  
 aut Italiæ (quanquam iam illa perpetuis  
 bellis per tot annos afflictæ et vexata es-  
 set) satis cladium ad illius ruinam suppe-  
 ditauerant, adhuc erat Christianorū san-  
 guine fœdanda, multi mortaliū necandi,  
 clarissimæ vrbes vastandæ, diripiendæ,  
 aliæ te adhuc victoriæ, alij triumphi, a-  
 lia gloriæ insignia ac monumenta mane-  
 bant. Quæ quidem ad Cæsaris nomē illu-  
 strandū minima tamē accessio erat; satis  
 illius in bellis virtus atq; præstātia toties  
 hostib. ab illo victis spectata; innocentia,  
 integritatē, fidem, religionē, iam suscepta  
 aduersus Turcas & Afros, toties ab illis  
 impedita in Christi hostes expeditio, exi-  
 miā illius esse declarauerat; lenitatē, man-  
 suetudinem, modestiam iam ipsi experti,  
 omnes qui illa auditu percepissent, admi-  
 rati erant; quæ essent in illo virtutes, quæ

animi ornamenta, ut illi intra Galliae fines se continuissent, omnibus erat exploratum. Abhorrebat Caesar ab hoc genere laudis, & cum eam gloriam quae sibi Christianorum sanguine constaret, oderat atque execrabatur, tum maximam atque clarissimam, si id sibi per eorum odium atque importunitatem liceret, de Turcis, de Afris, de Barbaris portendebat; inde victorias, supplicationes, trophaea, clarissima ad posteritatem monumenta, sanctissima Christi religione in antiquum suum splendorem & dignitatem sua virtute vindicata, ominabatur. Atqui cum vix à superiori clade Gallia respirasset, tot hominum milibus ad Neapolin cum exercitu amissis; per tot annos, tot sumptibus, tot delectibus militum habedis exhausta, noui exercitus, nouae copiae contrahuntur, eandem Italiam fatalem ad Gallici nominis exitium provinciam petunt, armis inuadunt, aliquot vrbes de improviso capiunt,

postremo amisso duce victi, profligati, fœdissimè fugiunt, vix quò se recipiant, qui tanto omniũ terrore in Italiam irrupissent, habētes. Magna semper (Cæsar) in omnib. bellis, quæ iam plurima gessisti, felicitas in te quidem spectata est; in eo longè maxima, nusquā à te partam victoriā nisi cū ipsis copiis duce exercitus esses potitus. Ticinensi pugna cū ceteri duces exercitus, tum Rex potētissimus captus, ad Neapolin & maior copiarū pars, & qui clarissimus Imperator ea tempestate haberetur, morbo absumptus, nouissimo hoc prælio cū tanta victoria tui potiti essent, dux hostium in eorū manus viuus perductus. Tanta in Christiana Repub. incommoda cū pax tandem cōsequuta esset, atq; ita illa quidem firmata, vt ipse victor in conditionib. pacis dicendis, nulla alia re, nisi virtute, præstātia, & quadam quasi altissimi animi exaggeratione victis superior esses, in Italiā ad insignia

im



imperij accipienda Bononiam venisti. Is  
 honos tibi ( & si qui honos diuina virtute  
 homini poterat satis eo dignus haberi? )  
 summus ac clarissimus ad posteritatem  
 fuit, non ille maiorū tuorum gloriæ, mo-  
 numētis, rebus gestis, triumphis; sed tue  
 virtuti, religioni, fidei, innocētiae, meritis  
 in Christianam Rempub. maximis & im-  
 mortalibus delatus. Nam illud omnes fa-  
 tentur, in tot tantisq̃ue religionis nostræ  
 naufragiis, quibus illa perpetuò iactata  
 est, nisi ipse quidam quasi moderator o-  
 mnium fluctuum ac belli ventorum af-  
 fuisses, vix tanquam in portum sic ad pa-  
 cem & otium vnquam fuisse venturam.  
 Quid enim? vtrum metu Cæsar aut quòd  
 bellando defessus esset, an quòd ea cura  
 illum sollicitum perpetuò haberet, vnum  
 semper illius studiū esset, Christi hostes  
 vlciscendi, debellandi, grauissimā labem  
 & maculam è sanctissima religione tol-  
 lendi, prohibebatur, toties à se vinci as-  
 suetum

suetum hostem vrgere, vlcisci, persequi,  
 non solum ex Italia pellere, sed de capite,  
 de regno, de salute in discrimen vocare?  
 Id igitur vt tibi integrũ esset, fœdus cum  
 hostibus victis, deteriori ipse cõditione fu-  
 turus icisti; ne Christi nauis naufragium  
 faceret, ac tot bellorum fluctibus obruta  
 mergeretur, iacturã rerum maximarum  
 fecisti; Insubrum principatu, in qua vna  
 prouincia totius nerui ac vires Imperij in  
 Italia essent, læsæ tuæ Maiestatis cõuictio-  
 homini tua spõte permissa, obsidibus libe-  
 ris infestissimo ac potentissimo Regi red-  
 ditis. At (hercule) neq; illud dici potest  
 quòd te iam suscepti belli pigeret, aut te  
 ad pacem inclinasse, aut multa quæ tuo  
 optuno iure essent, hostibus permisisse; cu-  
 ius vt declarati Imperatoris, ita mox Im-  
 perij adepti initia, bella, exercitus, clas-  
 ses, arma vltrò Barbaris illata essent fu-  
 tura. Nam illud interim minimè puto  
 silentio prætereundũ, quæ summa laus in-

Im-

Imperatore est, neminē aut pluribus vn-  
quam, aut grauioribus, aut magis inter  
se diuersis atque disiunctis bellis, aut ma-  
iore in iis gerendis constantia, firmitu-  
dine, animi robore praestitisse, plures an-  
nos in armis fuisse, maiores aut clariores  
res te vno gessisse. Si qui igitur tuas res  
(Caesar) eleuare volunt, Alexandrū Ma-  
cedonum Regem, Caesarem, Africanum,  
in contentionem vocāt: quorum gloriam,  
cū inuidia nulla quæ vetustate iamdiu  
obsoleuit, ledere possit, maximam homi-  
nes arbitrantur. At Alexandrum quan-  
quam adolescens admodum regnum ade-  
ptus, bellum Asiae intulit, neq; tot annos  
arma Asiatica exercuerunt, & cum iis  
populis bella gessit, qui neque aciem, neq;  
conspēctum armorum ferre possent, vna  
re tantum superiores futuri, si victores  
sua cede & occisione defatigarēt. Itaque  
vt illius incorrupta apud posteros gloria  
maneret, praeclare cum illo fortuna egit,

*immatura morte, cū nūquā illam aduersam expertus esset, in summo rerum humanarum fastigio è vita profecto.*

*Alioqui si Italiae, Galliae, Hispaniae, Germaniae prouincias bello lacepsisset, quæ Romanorū virtus, qui animus, quæ constantia, quæ rei militaris scientia, quæ Gallorum Germanorumq; robora ac vires essent, vnde ipse cū victoriis plurimis consequendis, tum triumphis clarissimis ducendis immortalem iam tibi gloriam paraſti, quid inter fœminas & viros interesset, pugnādo didicisset. Multa Cæsar præclarè, multa cum laude gessit, vniuersam Galliam, transalpes ad extremam Oceani oram, Germaniam omnem, Britanniam, atq; eam quidem toto à nobis orbe diuisam intra decem annos subegit, Imperio populi Romani adiecit, in prouinciæ formam redegit: in Italia, Hispania, Asia, Africa, vniuersis hostibus maximis præliis victis, immortalia suæ glo-*

gloriae monumenta reliquit, nemo negat:  
 sed ut mittam huic tanto illius splendori  
 multa alia tanquam tenebras offudisse,  
 arma ab illo iis populis illata, quibus, cum  
 nunquam populi Romani hostes fuissent,  
 multi censuerint illum esse dedendum: pa-  
 triam infestissimè oppugnatam, necatos  
 ciues, iura, magistratus, leges, maiorum  
 instituta violata, principi omnium gen-  
 tium vrbi acerbissimæ seruitutis iugum  
 impositū: quandiu cum Gallis, cum Ger-  
 manis, cum Britannis, cum Barbaris pu-  
 gnauit, nunquam non robore ac virtute  
 militum par, peritia rei militaris, consi-  
 lio, prudentia, superior fuit: civili quidem  
 bello aduersus Tyronum exercitum, &  
 ex colluione omnium gentium contra-  
 ctum, veteranū ipse militem habens per-  
 petuò pugnavit. Quæ (Hercule) ne ni-  
 mium eleuari atq; extenuari videantur,  
 ut sunt & summa & præclara, & digna  
 eo qui tecum tantæ virtutis ac gloriæ prin-  
 cipe

cipe conferatur, esse fateamur. At non nisi serò ille & XL. iam annum attingens ad res gerendas accessit; qua quidem ætate cum ipse ea gesseras, quæ te illi meritò aut præferrent, aut æquarent, tum totidem ad hunc diem annos, quot ille in bellis versatus est, multò plures posthac (quod speramus) tua augenda gloria, rebus maximis gerendis, eras in armis futurus. Iam Africanum; quanquam non semper ille suis auspiciis rem gessit, & post Cannensem pugnam illam memorabilem, Respublica ab illo Tribuno militum egregiè administrata, quam quidem iam labantem, districto gladio in eos qui illam prodere vellent, adolescens ingenti sui nominis gloria sustinuit: & quatuor Pœnorum exercitus in Hispania deleti, & munitissimæ vrbes expugnatæ, & nouissimè apud Carthaginem Annibal tantus belli dux, tot clarus victoriis, ac Romanorum cladibus, victus:

&amp;

& quidem (quod est grauissimū) eiusdem  
 testimonium, cū qui sua sententia cæ-  
 teris Imperator præclarior esset, ab illo  
 rogatus, vnū esse omnium maximū pro-  
 nuntiasset: & multa alia præterea, sum-  
 mum esse Imperatorem ac belli Ducem  
 ostenderunt. Neque tamē quicquam ab  
 illo posthac actum cum laude accepimus,  
 & Punicum illud bellum, cuius quidem  
 gesti gloriam tulit, nō amplius quā se-  
 decim annos perdurauit. At te (Cæsar)  
 totidem iam annos bella maxima geren-  
 tem, nemo vnquam defessum, defatiga-  
 tumq; vidit: fortiozem semper ad omnes  
 belli labores, ad pericula omnia subeun-  
 da animo paratiorem tanquam Hercu-  
 lem quendam, inuictō animi robore, omni-  
 bus fortunæ incommodis atque ærumnis  
 summa gloria perfunctum: metum, pauo-  
 rem, formidinem præ te agentem, Chri-  
 stiana Resp. experta est. Ceteros omnes  
 quanquam illos præclaros ac summos ha-  
 bitos,



bitos; at si quidem tecū conferantur tan-  
 quam minorū gentium Imperatores, ita  
 superasti, vt tibi faciat iniuriam, si quis  
 tecum illos in cōtentionem vocare velit.  
 Dum igitur more maiorum à Pontifice  
 Maximo Imperator appellatus, in Ita-  
 līe rebus constituendis, ac ciuitatum con-  
 uentibus peragēdis occupatus es, Solima-  
 nus Turcarū Imperator vacuam Panno-  
 niam præsidiis nactus, Viennam (vnde  
 etiam iam aliquot ab hinc annos, re in-  
 fecta, discesserat) exercitu .CCC. homi-  
 num millium comparato inuadit; haud  
 quaquam arbitratus, cū longissimè ab-  
 esses, te illi in tempore auxilio futurum.  
 In quo quidem Christianæ Reip. grauif-  
 simo discrimine, quanquā multa alia quæ  
 tibi constituenda superessent, te in Italiā  
 detinerent, ac tuum animū diuersum tra-  
 herent; ne ea spes tamen quā de te conce-  
 pissent, Christianos homines falleret, tan-  
 quam ad certam victoriā, ad hostes, atq;

ea quidem celeritate, ut cum vix credere  
 re possent, te nuncium de suo aduentu ac-  
 cepisse, in conspectum haberent, profe-  
 ctus es. Nemini dubium erat, si modò  
 barbari sui potestatem ad pugnam fecis-  
 sent, quo die dimicatum esset, non de eo-  
 rum nomine atq; imperio vniuerso actum  
 iri. Tantus metus illos inceserat, tanta  
 apud illos tui nominis auctoritas, tanta  
 tuæ virtutis opinio erat, ut quanquā ita  
 multi essent, nulla ut ratione iniri nume-  
 rus posse videretur, de fuga tamen con-  
 silia ceperint, obsidionem soluerint, fœ-  
 dissimè multis in locis tabernaculis atque  
 impedimentis relictis, abierint, non pau-  
 cis è suis quos in postremo agmine tui cō-  
 sequuti essent, amissis. Sic maximam de  
 illis victoriam tibi minimè præreptam,  
 in aliud tempus Deus Immortalis melio-  
 ri (ut credimus) consilio distulit: quod  
 quidem breui futurum ominamur. Satis  
 (Cæsar) intelligo, quamplurimis qui pro  
 rei

rei magnitudine id æstimare minus animis queant, quanquam (Hercule) nihil à te vsquam præclarius, aut maiori cum laude gestum facilè contenderim, non æquè magnum videri. Itaque cùm illud nemo non fateatur, hac tanta rei benè gerendæ tibi occasione prærepta, magno-  
perè vniuersis Christianis populis fuisse dolendum, quibus si victoriam esses assequutus, & Byzantium, & Asiam vniuersam spondere animis licuisset, tum eandem tibi gloriam, eosdem triumphos, honores deberi: atque si signis collatis cum hoste conflixisses, eum vicisses, æquè omnes fatentur. Quid enim? aderant vtrique instructa acie parati ad pugnandum, & Christianorum & Turcarum Imperator; vtroque gladij, bellica tormenta, milites, & quidem tantò barbari numero nostris superiores; de re summa, de vniuerso Europæ atque Asiæ Imperio agebatur: si quis pugnam detrectauit,

si quis trepidauit metu; si quis fuga salu-  
 tem sibi parauit, LXXX. mill. passuum  
 (quod mōstri simile esse videtur) eodem  
 die confecit, ille se victum, hostem victo-  
 rem pronunciaſſe; nomen, dignitatē, im-  
 perium (quantum in se eſſet) amiſiſſe, fa-  
 teatur neceſſe eſt. Illud quidem inter o-  
 mnes conſtat, ſummum ē regiis praeſectis  
 rogatum, quid ita tantus princeps, tanto  
 comparato exercitu, nulla re tanto belli  
 apparatu digna facta, abiſſet; ita reſpō-  
 diſſe, quòd nimium Caſaris fortunam ve-  
 reretur, non committendas temerè Aſiae  
 fortunas vnius diei praelio cenſuiſſe: atq;  
 nō me latet, varios eſſe belli euentus, neq;  
 ſemper hominū conſiliis fortunā reſpon-  
 dere: haud rarò quidem eos qui firmiori-  
 bus praeſidiis ad victoriam nitantur, ſua  
 ſpe fruſtrari; at nihil non hoſtem de ſua  
 clade, exitio, internicione; omnia contrā  
 certum Caſarem de victoria reddebant.  
 Ea omnia enim penes illum erant, miles

ex Hispaniæ, Italiæ, Germaniæ delecti-  
bus logo militiæ vsu exercitatus, qui pro  
religione sanctissima, pro aris & focis,  
pro communi omnium libertate, de vni-  
uerso Imperio Asiæ, quod præmiū victori  
propositum esset amplissimū, certaturus  
esset; Cæsar ipse exercitus Imperator; cū  
Cæsarem dico, omnium qui vnquam fue-  
runt Imperatorum præstantissimū dico;  
cæteri duces, quibus cū suam ætatē o-  
mnem in maximis bellis consumpsissent;  
nusquā vinci, semper vincere hostem con-  
tigisset; gloriæ quidem ac nominis cupi-  
ditas, pietas in Christianam Remp. sin-  
gularis, studium, hostium cōtemptus, cer-  
tam vincēdi spem afferrent: omnia apud  
hostē diuersissima, incondita multitudo,  
nouus miles, & qui cū nusquam ferri  
aciem, nusquam puluerem, nusquam stre-  
pitum armorum exaudisset, ægrè diiudi-  
cari posset, vtrum duci in retinendis ordi-  
nibus, an hosti in cædendo plus laboris

E iij . . . al-

allaturus esset; Iam qui tantis copiis Imperator praeesset, effœminatus, mollis, præfractus, fœminarum atque exoletorum antea illecebris ac lenociniis victus, nunc si se ad pugnam committeret, solo armorum aspectu vincendus; cæteri multitudinis duces huiusmodi, vt cùm ad libidinem, ad nequitiam, ad illecebras, ad corruptelas, ad omnia fœdiora vitia nati essent, neque quid laus, neque quid gloria esset, secum animo aestimare possent. At (hercule) ne ea omnia nobis argumento sint, quantã (Cæsar) rem gesseris, itaq; fateamur, cùm hostes quid de se, ac de tuis, si prælium committeretur sperarēt, adeò fœda ac turpi fuga ostenderint, penes quem victoria statura esset, dubium futurum; quantæ illud tibi gloriæ adscribi debet in tanto Christianæ Reipub. discrimine, summo quodam in illam studio pietatis, in vnius pugnae euentum te tantum Imperatorē, nomen, gloriam, Imperium, salu

salutem, vitam contulisse? Reipublicæ salutem ac dignitatem, potio-  
riorem atque antiquiorem tua salute habuisse? Id mea sententia tanti æstimandum est, ut tametsi nihil aliud in hoc tanto Imperio à te esset præclare gestum, te immortalibus ac diuinis honoribus dignum efficere contendam. Quid enim aut maius, aut præstantius in Christianæ Reipublicæ principe poterat excogitari, quàm si pro iis & sanguinem, & vitam profunderet, quibus Christus Optimus Maximus huius sanctissimæ religionis auctor, salutem suo sanguine, vitam morte & ea quidem omnium acerbissima attulisset? Nam tantum in te animi ardorem, tantam alacritatē fuisse, hoc te semper studio gloriæ flagrasse, & multa alia nobis & illud imprimis argumento esse potest, in superioribus omnibus bellis, quæ multam ac varia aduersus Christianos principes laceffit eorum iniuriis gesseras,



te nunquā ad eum diem affuisse, illi per  
 tuos duces gessisse; in hoc vno quod pro  
 Christiani nominis gloria susceptū, cum  
 Christi hostibus esset gerendū, ipsum in-  
 teresse, in acie stare, pugnare, aduerso pe-  
 ctore vulnera excipere, de capite, de sa-  
 lute dimicare voluisse. Ergo non solū  
 clarissimum illum Argiuorū regem, La-  
 cedæmoniorum Leonidam, Epaminun-  
 dam, Decios, Paulos, & si qui alij pro pa-  
 tria se hostibus deuouerūt, sed Christum  
 ipsum conseruatorē humani generis, cu-  
 ius religio sanctissima tuæ fidei commen-  
 data esset, æmulatus, non aureo diade-  
 mate, non sceptro, non orbe quem manu  
 geris, nō alius Imperij insignibus quibus  
 eras honestatus, sed bene de Christiana  
 religione merendo, pugnando, mortē pro  
 illius salute oppetendo, præstandam tibi  
 Imperatoriam dignitatē censuisti. Quan-  
 quā & in hoc ipso bello (audio enim Fa-  
 bium Maximū, qui nusquam cum Anni-  
 bale

confluxit, non minorem quàm *Afri-*  
*canū*, qui eum maximo praelio victum su-  
perauit, conseruatæ à se patriæ laudē re-  
tulisse) cū illud ita abs te feliciter terra  
esset gestum, vt imminentem propediem  
nostris capitibus ruinā, summa tua glo-  
ria auerteris; & maximā cladem *Tur-*  
*ca*, & insignem victoriam à tuis nauali  
pugna cōmissa *Christiana Respub.* tulit;  
*Coronis antiquiss. ciuitate (Andrea Auria*  
*maximi nominis Imperatore classis præ-*  
*fecto)* expugnatis, per vim captis, dire-  
ptis, innumerabilib. penè nostræ religiōis  
hostib. interfectis. Iam cū multò maiore  
cōparata classe ad eam urbem recipien-  
dam insequēti anno redissent, clarissimā  
tui victoriam de illis retulerūt; fortissi-  
mis militibus qui in ea vrbe iam vltima  
essent passi, quorumque egregia opera in  
difficillimis *Reip.* temporibus vsus esses;  
quo die cum hostib. de deditiōe transe-  
gissent, sibi ipsis ac *Christiana Reipub.*  
ita

ita opportunè conseruatis, barbaris omnibus, partim disiecta, partim incensa classe, aut captis, aut necatis, aut in fugā coniectis. Ceterū cū eum exitum tantum hoc bellum habuisset, satisque ab ea parte Respublica tua virtute iam tuta esse videretur, ne qua orbis terrarū pars vacua tuis triumphis, ac victoriis esset, bellum illud Africanum excepit, grauissimū illud quidem, & nisi victoria penes nostros stetisset, exitio atque ruinæ omnibus Christianis populis futurū. Ænobarbus erat Turcarum classis præfectus acerrimo vir ingenio, & ob multa quæ præclarè in Christianos gesserat, à Solimano eorū Imperatore Tuneti Rex appellatus, quam ciuitatem totius Africae opulentissimā, per vim Muleasse Rege inde eiecto occupauerat. Perniciosissimū id esse apparebat, cū Europæ vniuersæ, tum Hispaniæ imprimis, quæ opportunior cæteris loci vicinitate barbari

in-

iniuriis esset. Iam pridem vires atque opes illius formidabiles Christiano populo erant, nunc tanti regni accessione, videbantur posthac nulla posse ratione perferri. Quæ mala, quæ clades, quæ damna exspectari ab hoste infestissimo possunt, et qui maximis viribus ad iniuriam vatur, exspectanda nobis quotidie erant; captiuitates, cædes, euersiones, incendia, excidia vrbium, innumerabilia mala, nisi qui vnus iis obuiam ire posses, te excitasses, tantum hostem coercendum, bello persequendum, Regno, fortunis, tantis opibus spoliandum, de medio tollendum, tibi tua virtute censuisses. Itaqué proposito edicto, quo die tibi ad Barchinonam tui prestò cum classe essent, CC. inde nauibus profectus, secundissimaque fortuna vsus, ad Africæ litora paucis admodum post tuam profectiorem diebus appulisti. Inde militibus expositis, captaq; munitissima arce,  
quæ

quæ .XII. mill. passuum interuallo ob-  
 iecta vrbi firmissimis præfidiis teneba-  
 tur: urbem cepisti .XX. hominū millib.  
 qui in acerbissima seruitute agerent liber-  
 tati restitutis. Intelligo (Cæsar) sæpè e-  
 nim illud mihi testandum est, pro rerum  
 tuarum magnitudine, nimis à me breui o-  
 ratione illas perstringi: eas autem quan-  
 quam vt gestæ essent explicari possent,  
 omnem tamen fidem superare, ac procul  
 à veritate abesse existimatum iri. Neque  
 enim me illud fugit, nisi in oculis atque  
 in conspectu omnium, & ita vt neminem  
 latere possent, tuas res gessisses, quamplu-  
 rimos (qui morbus latissimè patet) à me  
 illas assentandi gratia ita auctas esse ex-  
 istimatuos. Sed & te (Cæsar) singula-  
 ris tua virtus, dignitas, gloria, præterea  
 hominum studia, laudes, honores, cū illa  
 non nisi amplissimis atque immortalibus  
 in Remp. meritis debeantur, ne quis tibi  
 assentari videatur, tutum præstant: &

me ab hac culpa longissimè abesse, mea  
præterea antea acta vita & mores facile  
testari possunt. Ne igitur multus in eo  
sim, quantum tibi nominis ac gloriæ hoc  
bello ita prosperè atque è Christiana Re  
publica gesto, quantum existimationis  
accesserit, quod tu tamen iam cumula  
tissimè adeptus eras; quid potuit Christi  
anis hominibus aut præclarius, aut com  
modius, aut ad eorum salutem aptius ac  
cidere, quàm tot hominum millibus è du  
rissima vitæ cōditione in libertatem ascit  
is, suis priuatim ac Reip. redditis, Mare  
perpetuis antea latrociniis infestissimum  
liberum nauigationi patefactum, vecti  
galia quæ belli ac pacis tempore ita libe  
ris populis necessaria essent restituta, fi  
dem in ciuitatibus retentam, tuta vbique  
omnia vnius virtute, fortuna, ac felicitate  
reddita esse? Nam (Hercule) ni animad  
uerterè non deesse hoc tempore, qui tuam  
(Cæsar) immortalem ac diuinam virtu  
tem

tem perstringere maledictis auderēt, minime mihi illud commemorandum putarem, te id quod grauissimum ac difficilimum est, ab eo regno abstinere potuisse, quod opulentissimū in Africa esset, quod ad res in ea prouincia gerendas opportunissimum, quod summa virtute maximā victoriam adeptus obtinuisses, eo qui inde pulsus hostium iniuriis esset, nullo illius antea studio, beneficio, prouocatus, homine barbaro praesertim, rursus imperare iusso. Quæ malum hæc est hominum audacia, amentia, importunitas? Illum vides, cuius rei causa quamplurimi in parentes, in liberos saeuierunt, grauissimaq; scelera susceperunt, regna, principatus, imperia ab se abiudicare, ob aliorum comoda arma capere, bella grauissima gerere; de imperio, de capite, pro Christianæ Reipublicæ salute ac dignitate dimicare: victoriæ laudem ad illum, comoda ac præmia omnia ad alios peruenire



nire: & ita tamen nefariè atque impu-  
denter maledictis illum, inquam, inces-  
sere audes? Nam quòd arcem maximam  
& munitissimam, quæ vrbi immineret,  
præsidio imposito retinuit, fuit id sum-  
mo consilio à Cæsare factum. Neque  
enim barbaro homini & leuissimo inge-  
nio, atque (id quod caput est) à nostra  
abhorrenti religione, fidendum erat.  
Itaque nihil ab illo sapientius excogita-  
ri potuit, vt illum in officio contineret,  
quàm tanto illi præcepto propugnacu-  
lo, omnem ad res nouas moliendas oc-  
casionem adimere: mare ab ea parte,  
ne quid inde incommodi Respublica ac-  
ciperet, tutum præstare. Victor igitur  
Cæsar, atque vniuersis hostibus è regno  
illo eiectis, ac profligatis, in Siciliam,  
atque inde in Italiam profectus, Nea-  
polin ad triumphum pro rebus tantis  
agendum, summa populorum omnium  
expectatione, venisti: quæ vrbs aliàs  
sem-

semper tui studiosissima, iis te honoribus  
tum prosequuta est, ut victori omnium  
gentium, neque ampliores, neque clario-  
res haberi ulli potuerint. Inde cæteris I-  
talie ciuitatibus aditis (video enim, mihi  
cùm ad alia maiora contendam, minimè  
nunc illa esse commemoranda, qui ad te  
hominum concursus fierent, quæ obuiam  
itationes, quæ omnium ordinũ studia, gra-  
tulationes, cùm te Christianæ Reip. pa-  
rentem, & conseruatorem, passim omnes  
effusi è ciuitatib. consalutarent) ne tibi in  
otio diutius esse liceret, ad bellum Galli-  
cum proficisceris, Regiis dum ipse aduer-  
sus Christi hostes sanctissimam eius reli-  
gionem defendis, Taurinos ac Salassios,  
quarum gentium principatum ad se spe-  
ctare iure gentium contenderent, subito  
aggressis. In quo bell. gerendo (ne plura  
dicam) cùm iam bie. mium in armis ho-  
stes fuissent, ac per varios duces insigni-  
bus perfuncti cladibus rem gessissent, ita  
sem

semper eos superasti, vt tandem apparuerit, Gallòs ad Cæsaris gloriam augendam bella suscipere, ad arma ire, res semper gerere solitos. Induciæ tantum bellum consequutæ sunt, victore Cæsare ad ea bella properante, quæ non ex sua solùm, sed ex Christianæ etiam Reipublicæ dignitate essent. Namque clarissimum ille in ea re suæ in Christianam Rempublicam pietatis semper documentum dedit; in secundis suis, aduersis hostium rebus, nullam vnquam pacis conditionem, quamuis parum æquã, aut ex victoris omnium gentium dignitate, vt sibi otium ab armis Gallorum agenti bella cum communib. hostibus gerere liceret, auersatus. Itaque fœdere cum Gallis (spectante Pontifice Romano, ad Niceam urbem Narbonensis Gallie) percusso, bellum cum Mauris gesturus, cum eorum latrociniis & excursionibus maria omnia in Europa essent infesta, in Italiam ad classem comparandam discessisti

sisti. Lata primum expeditio, mox ratio  
 belli gerendi huiusmodi, ut nisi cælum,  
 terram, mare prorsus tibi parere coge-  
 res, victoria de hostibus aliter potiri non  
 posses. Disiecta classis, fractæ naues,  
 perpetuis imbris corrupti commeatus,  
 amissa tormenta, omnia in hostili terra  
 infesta, nulla oppida, nulla tecta: tot  
 mala consequuta fames, difficultas pe-  
 tendi ex Europa commeatus, fracti tot  
 cladibus militum animi: cū vnus Cæ-  
 sar inuictus ad omnia, passim in taber-  
 naculis milites desperantes de summa  
 rerum, solareris, confirmares, ad mili-  
 taria munera obeunda excitares, quem  
 animum in aduersis & fluxis rebus ge-  
 rere deberent, tuo exemplo doceres. Inter  
 quæ omnia illud diuinæ atque admirabi-  
 lis cuiusdam virtutis fuit, cū classe lu-  
 liam Cæsaream appulsa, quod oppidum  
 loci opportunitate, ad bellum gerendum  
 ap-

aptissimum, Barbari delegerant; princeps omnium cum hostibus manum conseruisses, nisi omnibus in nauibus impositis, ipsum prius nauim conscendere, aut soluere noluisse. Sequitur bellum, quod cum Menapiis gessisti, qui te in Africa res gerente, Belgis qui tuæ ditionis essent, arma intulerant. Aduersis enim rumoribus ad multitudinem excitandam passim dissipatis, te cum ex Africa re infecta solueres, naufragio cum vniuersis copiis interiisse: facile ex ciuitatibus iuuentutem ad arma exciuerant, atque adiunctis Gallis, Belgas nihil minus quam huiusmodi quicquam metuentes, de improviso erant adorti. Ergo bellum (vt Galli abessent) per se grauissimum, cum ad Cal. Iul. ad hostem isses, ac partim vi, partim metu, partim deditione, vniuersas hostium vrbes recepisses, quæ prima vim experiri maluisset, militi

diripiendam tradidisses, grauissima pericula ipse adiisses, extra munimenta saepe, atq; ita vt tibi ad pedes crebris tormentorum ictibus iactae sphaerulae acciderent, summo vitae discrimine processisses, coactō nobilissimo ac potentissimo Regulo ad deditionē venire; intra duos menses iam ad integrum aliud Gallicum intentus, confecisti. Quo gerendo bello eousq; progressus, vt propediem hostes essent de salute Imperij in discrimen venturi, eos ad conditiones pacis descendere coegisti, id enixè Christianis populis qui tot clades ac ruinas execrarentur, precibus ac votis à te contendentib. Neq; verò quæ inter bellandū tot antea iam partis victoriis, ac triumphis digna gesseris, commemorare hoc tempore constitui, & sunt enim innumerable, & ipse iam perfeceras tua virtute, vt nulla oratione res tuae gestae explicari, in hoc studio laudis, cuius te esse audissimū nunquam dissimulasti, nulla

sa-

*satis pares laudes tibi attribui possent. Itaq; illud est in te admirabile, ut pro rerum à te gestarum magnitudine satis dignè laudari non possis, præter te vnum accusandum esse neminem; quæ laus maxima est, in promerendis laudibus, laudes te omnium superasse, omnia præmia quæ maiora atque ampliora rectè factis proponi soleant, tuis rebus gestis inferiora ostendisse. Iam inter tot bella adeò graui ac difficilia versanti tibi nunciatum erat Germanos ad defectionem spectare, Philippo Landgrauio Hassiæ, & Iohanne Friderico Saxonum Duce res novas molientibus. Expeditionem igitur longè difficillimam aduersus nobilissimam gentem, & per multos iam annos viris, armis, omni apparatu belli florentissimam, aduersa quidem omnium opinione suscepisti; sed eo consilio ut tandè exitu belli constiterit, non te solùm suscipiendis, sed finiendis bellis, & prudentia, & virtute;*



& felicitate, & omnibus aliis Impera-  
 toriis artibus semper alias, sed eo tem-  
 pore maximè, omnibus qui vnquam bel-  
 la grauiora gessissent, præstitisse. Prin-  
 cipio enim cùm bellum iam per aliquot  
 annos crebris conciliis ciuitatũ, & apud  
 multitudinẽ in cõcionibus iactatum, tan-  
 dem in apertum erumperet, quanquam  
 ipse præter exiguam Hispanorum ma-  
 num, quam præsidij causa apud te ha-  
 beres, nullis præterea copiis, auxiliis, a-  
 lioue belli apparatu munitus esses, defe-  
 ctionis tamen auctores hostes declaran-  
 dos, iure eligendi Imperatoris (quæ di-  
 gnitas maxima est) spoliãdos, bello per-  
 sequendos, censuisti; nunciis in Italiam,  
 in Hispaniam, in Belgas ad militem co-  
 gendum dimissis. Neque verò dum alij  
 delectibus habendis occupantur, ipse ces-  
 sare aut in otio esse potuisti; neque au-  
 xiliis quæ à Pontifice Maximo mitte-  
 bantur expectatis, ad hostes cùm illi pe-  
 ditum

ditum .LXXX. equitum .XX. mil-  
 lia in armis haberent, profectus. Sanè  
 constat cùm ad Ingolstadtum Norico-  
 rum urbem, tuos intra vallum equitatu  
 longè inferior contineres; te millies ac  
 ducenties maiorum tormentorum icli-  
 bus petatum esse, in summo quidem pa-  
 uore ac consternatione omnium; adeò  
 hostem contempsisse, vt intra ordines  
 milites, adhortantis vultum atque oris  
 alacritatem intuentes, pugnae signum  
 poscerent, verso repente in audaciam  
 metu, in hostem proscisso vallo, erum-  
 pere, ruere in certam mortem, vltro vi-  
 derentur. Eundem vultum atque animi  
 habitum cùm ad Lohingum, quà ad exer-  
 citum commeatus importabatur, castra  
 posuisses, veritus ne si eum locum hostis  
 præoccuparet, facile ad tuos aditum in-  
 tercluderet, hyemis difficillimo tempo-  
 re, perpetuis imbribus, summa locorum  
 iniquitate, cùm lino vestigiis cedente,

F iij neque

neque tentoria figi, neque vsquam miles  
 consistere posset; fame, frigore, tabe o-  
 mnes passim conficerentur, eandem (in-  
 quam) constantiam & alacritatem prae-  
 te semper tulisti; celsum atque erectum  
 te ad subeunda omnia fortunae incom-  
 moda ostendisti. Eiusdem constantiae  
 fuit, cedentem hostem (quanquam mili-  
 tes niuium magnitudine obruente) inse-  
 qui, haerere semper in vestigiis, ultro mis-  
 so caduceatore pacis condiciones offeren-  
 tem, nunquam nisi se penitus suae pote-  
 stati permetteret, audire voluisse; cum is  
 hostis esset, ea potentia, his viribus, ipse  
 in hostili terra, durissimo anni tempore,  
 ea frigoris magnitudine, quam vix susti-  
 nere sub tectis facile esset, rem gereres, in  
 itinere esses, militem in opere, in campo,  
 in acie haberes. Ergo tantam virtutem  
 consequuta sua praemia sunt, haud dubie  
 iam vniuersis Germaniae ciuitatibus se  
 tibi certatim deditibus, hostibus cum

de summa rerum desperarent, suam singulis fortunam respicientibus, ac gratiæ & veniæ locum apud victorem captantibus. Non minori felicitate Saxonas aggressus, cum eos insita animis ferocia adhuc in armis haberet, atq; insolentiores & contumaciores redderet, duce eorum viuo (quod tibi semper fatale fuit) in potestatem redacto vicisti, interim te venisse, vidisse, Deum quidem immortalem vicisse, summa pietatis laude testatus. Multa sanè in eo bello & admirantur nostri temporis homines, & qui postea sunt futuri mirabuntur, gentis nobilitatem qua cum bellum gessisti, opes, potentiam, rerum iam à primis temporibus à maioribus gestarum magnitudinem, cæsos Romanos duces, deletos exercitus spectantes; quæ cum omnia per se quidem maxima, iam sunt à multis monumentis tradita literarum; tum si ego persequi oratione velim, me antea vox, la-

latus, vires, dies ipse deficiat, quàm minimam eorum partem videar assequutus esse dicendo. Sed illud quidem præter quàm in te vno Cæsare in omnib. dignum summa admiratione; superbissimos atq; insolentissimos hostes qui tuum latus, iugulum, vitam petissent, à te conseruatos; neminem nisi armatum & in acie cecidisse. Quæ res quidem si tanta est, quantam hi esse intelligunt, qui quàm dulce ac iucundum sit inimicum vlcisci, sunt aliquando in vita experti, vna me ratione facile consequi dicendo sperabo, si me eam non posse dicendo consequi fuero professus. Noua genera laudandi, & non antea eruditis hominibus excogitata (idem enim video mihi crebro esse testandum) cum te sæpè meritum hoc genus laudis esse constet, & magnitudine ingenij, eruditionis, eloquentiæ clarus ac nouus orator, cum noua sint omnia quæ gesseris, adhibendus erat, qui de tuis lau-  
dibus

dibus verba faceret; is cum ego esse non possim, ita inquam me maximam tibi laudem allaturum spondebo, si non solum hanc meam, quaecumque illa est, in dicendo facultatem, sed omnem vim, copiam, eloquentiam tuis laudibus inferiore esse contendero. Bella multa, varia, tot annos cum variis hostibus, nunquam vario euentu gessisti. Italiam, Africam, Germaniam, Galliam, Pannoniam, terra marique rebus maximis gerendis, clarissimis parandis victoriis aut ipse peragrasti, aut per tuos duces lustrasti. Reges inimicos maximos belli duces, nouissime Germanorum longe nobilissimos principes, victos maximis praeliis, cepisti; vnum, quod inter omnes constat, Christianae Reip. maxime formidabilem hostem, cum CCC. hominum milibus in Pannoniam inuasisset, tuo aduentu repressisti, re infecta summa sua ignominia retro redire coegisti, eiusdem classis praefectum, maximi nominis Imperatorem  
pos-

possessione Africae viribus opulentissimi  
 regni spoliasti, in capta atque direpta vr  
 be .X X. hominum millibus è durissima  
 seruitute liberatis: Taurinos, Salassios,  
 cæteras alpinas gentes, quæ ad Gallos de  
 fecerant, graui acriq̃ue bello persequutus  
 ad officium reuocasti: rursus in Africam  
 (suscepta expeditione) quanquã vi tem  
 pestatis, fluctuum, imbrium, multis cla  
 dibus obrutus, inuictæ & incredibilis cu  
 iusdam virtutis ac constantie monumen  
 ta reliquisti. Menapij dum ipse aduersa  
 fortuna rem in Africa geris, sublatis a  
 nimis, Belgis tuæ ditionis hominib. arma  
 intulerant, eos bello aggressus coërcuisti.  
 Veteres hostes Gallos sæpè à te victos, no  
 uissimè intra regni fines compulsos, ad pa  
 cis conditiones descendere coëgisti. Bello  
 postremo Germanis illato, nobilissimam  
 bello gentem, auctioribus defectionis viuis  
 captis vicisti, veteri Imperio adiunxisti:  
 in tueuda Imperij Maiestate maximis  
 per-



perfunctus incōmodis, laborib. ærumnis,  
inter grauiſſima ac maxima bella terra  
marique gerēda, iam. XXXVI. annum  
ſemper eandem fortunam expertus, in-  
uictum, inſuperabilem, dignum tanta in  
terrīs dignitate præſtitisti: cū Deus  
Immortalis ſummam ſemper tibi facul-  
tatem vlciscendi hoſtes feciſſet, pluri-  
ma tuæ clementiæ, humanitatis, nullā ſæ-  
uitiæ aut crudelitatis monumenta exſta-  
re voluiſti: rebus gerendis, bellis, victo-  
riis clarus: conſeruandis hoſtibus, obli-  
terandis iniuriis, beneficiis maximis dan-  
dis, longè clariffimus; ſalutarem ſemper  
Chriſtianæ Reipublicæ principem, quan-  
diu tibi per tuos hoſtes licuit, oſtendiſti.  
Quæ omnia niſi quis ſe facilius admirari,  
quàm dicendo complecti poſſe fateatur,  
idem quoque fateatur neceſſe eſt, omnes  
virtutes, omnia animi bona, omnes artes  
quæ in viro principe, in Imperatore, in  
ſummo belli duce cumulatiſſimæ eſſe poſ-  
ſint.

sint, fuerint tamen vnquam in nemine,  
 stylo orationis persequi, atque saltem ex  
 parte adumbrare posse. Quare frueri  
 hac tua gloria (Caesar) & vnus in terris  
 assequutus, vt cum laudes maxima &  
 immortales tibi debeantur, nullis tamen  
 quae te dignae sint, affici laudibus possis:  
 me quidem cum quicquid arte, ingenio,  
 vsu valui, in tuas laudes contulerim,  
 & amplissimis tuis atq; immor-  
 talibus in Christianam Rem-  
 publicam meritis, &  
 meo officio patere  
 satisfecisse.

Pagina .j. quatern. C. lin. xiiij. leges  
 aut metu, aut spe, aut magnitudine.  
 Item pag. penult. quatern. D. lin. vj.  
 tum totidem annos. Si qua praeterea  
 errata sunt, cum illa haud ita magni  
 sint momenti, negligenda duximus.